

**Erich Bolinius**

[www.erichbolinius.de](http://www.erichbolinius.de)

[Erich.Bolinus@t-online.de](mailto:Erich.Bolinus@t-online.de)

## **Bericht über den BSV Kickers Emden - Sendung „Flutlicht“ auf Radio Ostfriesland**

**Donnerstag, 6.9.2012 18.05 Uhr** auf 94.0 bzw. 87,7

Leev Toehörers,

Junge, wat was dat lesd Saterdag 'n spannend Spöl tüsken Kickers Emden und BW Lohne, dat Kickers lesden Enn 'n bietje glückelk mit 2:1 wunnen hett. Dorna sach da anfangs gaar neet ut. Wall harr Kickers in de 13. Menüte dör **Martin Habben** in Föhren gahn muss, man he kunn heel un dall freei de Ball neet an de Torwart vörbi brengen. Un dat was dat dann ok. Nu leep nix mehr. De Gast overnahm de Kontrolle over dat Spöl. Un se gung dör 'n herrelke Koppball van **Julius Liegmann** na 'n moi Flank van **Kai Hartmann** verdeent mit 1:0 in Föhren. Disse harr se noch utbauen kunn. All paar Menüten gung dat hoog her in de Straafraum van Kickers Emden. Kört vör de Paus harr Kickers aber bold noch utgleken. 'n Freetrapp van **Thilko Boekhoff** gung an 't Lattenkrüz.

Vörher harr Trainer **Yasin Turan Tobias Bruns**, de na mien Menen gaar neet schlecht spölte, för **Bernd Grotluschen** inwesselt. Ik hebb docht, dat he Bernd Grotluschen in de Achtermannskupp setten de, um de sekere toe maken. Man nix d`van. Bernd Grotluschen gung in de Störm. Un dat was 'n goed Schachzug, wall disse erfahrene Spöler, de immer weer lang Ballen, de na vörn spölt wurren, goed annehmen dee. So gung mehr Gefahr van de Kickersstörm ut.

In de Halvtiedpaus was ik, nettso as de ruugweg 300 Toekiekers, leep untoefree. Ik see an Floetlüchtmoderator **Berthold Janssen**, dat de Kickersspölers sük wall „bemühen“ würrn, aber neet beter kunnen. Ik bün ehrelk, dat Kickers dat Spöl noch dreihen würr, dormit hebb ik toe disse Tied neet rekend.

Na de Pausentee drückte Kickers wall mehr, man twingende Kansen bleven anfangs ut. Dorför settesten de Lohner stückofwat Konter. Aber so recht gefahrelk wassen de ok neet. Un dat sull Lohne noch seer daan. Dat sük wat in de Spölverloop ännern dee, harr Kickers Thilko Boekhoff toe verdanken. He schnappte sük in de 66. Menüte de Ball un setteste toe 'n Dribbling dör de hele Lohner Ofwehr an, umkurvte 4 Tegenspölers as Fahnenstangen, un harr dann noch 'n Oog för Bernd Grotluschen, de de Ball blot noch over de Streek skuven muss. Dat was heel groot Klasse van Thilko Boekhoff!

In de lesd 20. Menüte wurr dat Spöl ok van Kickers beter un man was overlegen. Man de Konters van Lohne bleven gefahrelk. In de 83. Menüte kunnen all Emders juchheien. **Christoph Appeldorn**, de inwesselt worden was, gaff 'n moi Flanke in de Torraum, wor **Tido Tuitjer**, de för Martin Habben komen was, de Ball tegen de Loopricht van de stark Torwart **Philip Kreimer** in 't Nett unnerbringen kunn. Dorna versöchte Lohne noch maal alles, man Kickers leet sük neet noch maal overrumpeln – un drie Punkte bleven in Emden.

Sönndag um Klock drie geiht dat nu in de Oostfreeslandstadion tegen BW Hollage, de upstünns up de darte Platz in de Tabelle van de Landesliga stahn. Dat word seker weer 'n heel stur Spöl för Kickers Emden. Aber ik löv, dat Kickers ok dat veerde Spöl up egen Platz winnen deit. Un ik hoop, dat 'n paar mehr Fans toe disse Spöl komen, as tegen Lohne lesd Saterdag. Ik tip up 2:1 för Kickers Emden.

So, nu as alltied, 'n kört Foetballwitz:

Stefan verseggt bi Susanne up de hele Linie. He murmelt heel zerknirscht: „Dat is raar, up de Foetballplatz bün ik immer in Hoogförm“. „Goed“, seggt se, „dann versöken wi dat mörgen maal dor.“

Leev Toehörers van Radio Oostfreesland,  
dat was dat weer maal för disse Week,  
ik hoop, Joe hett dat Plattdütsk gefallen, denn mien Motto heet ja alltied,  
plattdüütsk dürt - nettso as Kickers Emden – neet unnergahn.  
Bit anner Maal  
Joe  
Erich Bolinius  
ut Emden-Petjem.